

■ ORD LA VITA DA LUDMILLA CAHENZLI

Fritgs che creschan sin la planta fallada

«Mamma, jau dovr trais ordinaturs.»

«Ordinaturs?» dumond jau.
«Pertge?»

«Mettain per far urden.»

Jau sun paf. Mia figlia vul far urden cun ses plunder! Quai è nov. Onns ora hai jau predegia ch'ella duai cavigliar ils figls da scola en ina mappa. Jau n'avess gnanca pretendì ch'ella ordineschia cronologicamain quest material. Naba. Sch'ella avess mo mess ensemen mintgmai ils figls da chemia e quels da geometria. Ma ella stgadanava tut mo sin ina pluna, saja quai uss figls d'englais, receipts da cuschinar u verbs franzos.

Ma uss vai tuttina anc ora en bain, pens'jau. Mias admoniziuns portan fritg.

Jau vom ina lingua a tschergtar ordinaturs. En il pult d'Eugen chatt'jau dus ordinaturs veders ed als port a mia figlia.

«Na, quels èn grusigs. Jau less novs.»

Raschun ha'la, pens'jau guardand sin ils ordinaturs grischunais. Sch'ella ha gust da far urden, na ston ins betg tarladir tut cun ordinaturs stgiffus.

Dus dis pli tard essan nus en papetaria. I ha in'entira paraid cun ordinaturs. Giudim quels per 3.80, entamez quels per 8.70 e sisum quels per 16.80 che te gnan in'entira perpetnada.

«Stos jau prender ils pli bunmartgads?» dumonda mia figlia.

«Na, ti mo prenda ils pli buns», ditg jau e pens, sche mia figlia cumenza ina vita rugalada, less jau betg far da ranvera. En muments decisivs ston ins avair rauba da qualidad.

«Ma, quels entamez fissan atgnamain buns avunda», di mia figlia.

«Na, gliez. Ti po prenda rauba endretg», ditg jau.

Mia figlia tscherna in ordinatur rosa, in cler blau ed in violet. Jau paj l'investizium.

Cura che nus bandunain la

stizun fa ella: «Uss vom jau immediat a far urden. Sas tge ch'jau vi metter tut en ils ordinaturs?»

Ils figls da l'onn passà probabel en l'ordinatur rosa, quels da l'emprim semester en l'ordinatur cler blau ed il material actual en il violet, pens jau. Ma jau ditg: «Jau na sai betg. Tge mettass en ils ordinaturs?»

«En l'ordinatur rosa mett jau tut ils heftlis dad 'in touch'. En il cler blau mett jau ils posters ch'jau hai rimnà sut letg en. Ed en il violet vegnan las fotos da mias amias.»

I dat muments ch'igl è meglier da quescher. Da laschar valair ch'jau sun ina mamma uschè naiva, na fa betg da basegn.

Enten ir a chasa, ma sent jau in pau curiusa. I ma vegn endament: Ils fritgs che l'educaziun portan, creschan betg adina sin quella planta ch'ins avess gudent.